

di Bainzu Truddaju

“Cantu ses bellu messaju cand’aras!”

neit in Su Massaju Pedru Casu,

cando murmuttaiat chena pasu

“cun risu in coro e pregarìa in laras”.

Tando limpizaian sas arvadas

de s'aradu 'e sa linna in sos attunzos,

chi frundian interra oro a punzos

e fini sas campagna populadas.

Fumaian sos sulcos su manzanu

a su sole fecundo 'e Sant'Andria

e su messaju a sa prima giarìa

si ninnaiat cun su trigu in manu.

Fis bella tando, Sardigna istimada,

ma oe ses ancora pius bella:

in sa Costa Smeralda ses istella,

che perla in sa tela ricamada.

No has vias pius a impedrados,

ne ainos, ne caddos in sa gianna

cun sos imbastos garrigos de canna

e bertulas e saccos affumados.

Has cambiadu mantu 'e ti 'estire

a pompa sas piattas e carrelas:

alzache fin'a chelu sas bandelas,

ca su progressu t'hat fattu imbellire.

T'han fizos tos cantadu e brindadu

a su bomborombò in sas pinnettas

e-i sos chi connottu hasa poetas

t'han cun versos de oro recramadu.

Cando 'enin pro t'ider sos turistas

e miran sas bellesas chi possedis,

a coro in manu a bider lis cunzedis

sas pittorescas naturales vistas.

Ses bella, tenta in coro e adorada

da-e sos tuos caros emigrantes,

chi sun in terra anzena tribagliantes

cun duna nostalgia ismisurada.

Bastat, Sardigna mia, sighi e faghe

in sas tuas bellesas e impignos

e-i sos fizos ch'has siana dignos

de amare sa terra 'e su nuraghe.

Menzione al Premio Logudoro di poesia sul tema "Sardigna deris e oe", IV Edizione 1985.

Cfr. *30 annos de poesia e de limba sarda* , a cura di Francesco Cossu, Gavino Contu, Giuseppe Soddu, ed. Sodalizio Culturale Ozierese Pirastru-Cubeddu-Morittu, Ozieri 2013, pag. 110.